

# Dòp ëd l'italian, ël padan: N'ÀUTRA LENGHA CONTRA ÈL PIEMONT?

Coma s'an mancheisso nen j'italian — con sò professor (ch'a sudo saviessa e a spù lus e vrità), soe lej (për la tua e ij drit ëd le minoranse e rigorosament a fin ëd bin), e sò giornaj, adess i 'ndoma a 'rzigh d'avèj n'autër nemis: ij padan e l'ghèddo ëd quaidun d'avèj na lenga padan-a (ël "padanèis"). A l'avia ancaminà, tanti ani 'ndarera, un simpatic giovo ëd Bològna, Daniele Vitali, che — motobin prima ëd Bossi e dij sò amis — as proclamava... padan e a parlava dl'unità lenghistica dël Nòrd dël pais che "schiaivo di Roma Iddio lo creò": l'eterna republica dij'italian. Gnente 'd mal, as capiss; dzortut an savend che Vitali, chiel, padan "politich" a l'é mai stait. Ant ël midem temp, apoprè, an Australia, Geoffrey Hull (d'origin lombarda) a sostni che le parlade che normalment as ciamo "gal-italiche" (piemontèis, lombard, genovèis, emilian, venet e via parèj) a fusso n'istessa lenga che, për rason èstòriche, a l'era "falia", sensa avèj ël temp ëd fé nasse na lenga, o "koiné", comun-a. Lè studi d'Hull a l'é motobin anportant e serios, contut ch'a sia mai stait publicà. Pì davzin a noi, ant ël temp e ant ël spassi, Sergio Salvi a descovrìa quèich ann andarera la Padania ant un bel liber (leslo, s'i l'ave ancor nen falò): "L'Italia non esiste".

A i-é na part ch'i podrìo tuti sotsigné ant ël liber ëd Salvi: a l'é la denusia, motobin documentà, 'd cola bala ëd fum ch'a l'han mostane a ciame Italia: un pais che da na part a dovrìa avèj na giustifission geografica (!?!), ma, da l'otra part, ij "pare dla patria" (dji'italian) a vorìo 'dcò che a l'unità geografica as gionteissa n'unità lenghistica, etnica, e via parèj. Coj che a j'ero nen vaire italian a dovìo fé na bruta fin, j'autri as dovìo convincesse — për sò bin, as capiss. Për capì tut sòn, e tante d'altre bele

neuve, che a scòla at diso nen, an sij tentativ, tragich, ëd dé un sens a l'Italia, ël liber ëd Salvi a l'é anportant.

Ma a i-é n'otra part, ant ël travaj ëd Salvi (e dij sò epigon e amis padan) ch'am pias nen — e a peul nen fé pias a gnun autonomista: an essend che, storicament, le parlade dla Padania a son tute sorele e a l'han ëd carateristiche an comun, a vanta fé nasse na cossensa padan-a. Bin. Costa cossensa a peul nasse 'dcò an conosend le rèis comun-e ëd tute le parlade dla Padania. Bin. As podrìa 'dcò prové a fé nasse na lenga padan-a unica, për podèj arziste mej a l'Italia e a l'italian. E si i soma pì nen d'acòrdi.

Dòp d'un pòch, l'associassion "Libera Compagnia Padana" a proponia na "grafia padan-a unificà", ch'a sarìa peuj cola che i peule trovè dòp dij nòm ëd pais an italian ant ël giornal "la Padania". Nopà d'ampren-de 'n pòch ëd grafia piemontèisa (genovèisa, veneta, furlan-a, e anans parèj), lor-sì a son angignasse a fé j'originaj. Për esempi, Turin a ven a esse "Türin". E Ast a ven a esse "Ast" (i saj nen se noi d' "Assion Piemontèisa" i soma bastansa sofisticà con nosta grafica, ma a l'é na "a" con un cit sècc ansima, com a-i é ant la grafia dël danès). N'analisi 'd costa grafia a l'é fòrt antressanta perchè a fa capì ij tipich eror ëd tuti coj che, an bon-a fé, as buto a fé ëd lenghistica sensa savejne bastansa. Ma a fa 'dcò capì che "anventé" na lenga, e fin-a mach anventé na grafia, a l'é motobin pì malfé 'd lòn che as peula pensesse quand che un a varda le boricade e inconsistense dle grafie "stòriche".

Për esempi, për anventé na grafia a vanta prima esse bon a separé, ant na lenga, ij fonema da j'aldòn, e, lassemlo di (mi i l'hai falò e lo faso ancor për mesté), a l'é 'n travaj bin malfé. Ij fonema a son nen tuti ij son

ëd na lenga, ma mach coj ch'a son distintiv, ch'a servo a des-serne paròle diferente: për esempi, "l" e "r" a son fonema an piemontèis (e an fransèis, italian e, an general, ant le lenghe d'Europa: "lan-a" e "ran-a" a son doe paròle diverse che a l'é mej des-serne — se un a veul fesse capi). Ma le motobin diferente manere 'd pronosé la "r" a son nen fonema, ma, giustament, alò-fon, che a vario an rason dël pais, dla famija e fin-a dla pèrson-a (mi i l'hai diferenta dai mè frej). A-i podràn, d'otra part, essje ëd lenghe ch'a l'han doe, o fin-a tre, "r" (èd son che, a nojautri, an èsmi jo tuti esse "davzin" a "r"). Parèj, ël piemontèis a l'ha neuv fonema vocalich (che a sè scrivo "i", "u", "ò", "eu", "o", "a", "è", "e", le doe "a") che a son segnà, an manera un pòch balorda e mach minca tant, "é" e "è"). Ma ant ël Piemont la "a" a peul esse pì andarera ò pì anans; an gener, da Ast an giù "a" a l'é pì andarera che a Turin. A l'é na carateristica che a peul serve për arconosse 'd anté ch'a ven un, ma a l'é nen un fonema different (perchè a l'é nen "an oposission" con n'otra "a": a-i son nen, a Ast, doe "a"); e donch a l'ha gnun sens fé na grafia dl'astesan an marcand costa "a" (a l'ha 'n sens ant lè studi dla fonetica d'astesan, ma costa a l'é n'otra stòria).

La grafia "padanèisa" a l'é 'dcò antressanta perchè an mosta, na vira ëd pì, che, an gener, chi ch'a s'avzin-a a lè studi dla lenghistica a s'antressa a la stòria e a la classificassion dle lenghe: i l'hai mai capì bin perchè — a mi savèj coma a fonsion-a na lenga al di d'ancheuj, com a fa për esempi un piemontèis a savèj quand ch'a deuv dovré "i sai nen" e quand "i sai pà", cole regole ch'i l'oma an nosta testa, a mè smija franch pì antressant che, va a savèj, l'origin dla paròla "falabrach" (ch'i sai nen).

Ma nen për chi a s'avzin-a a la lenghistica e, as capiss, as contenta nen dè studiè ròba da pòch, ma a veul arzolve tuti ij problema dël mond.

S'i pense, a l'é coma an tante d'altre siense: j'archeòlogh diletant a veulo descheuvre l'arca 'd Monsù Noè o ij mister ëd le Piramidi; j'archeòlogh professionista as contento 'd meno, perchè a san che l'arca 'd Noè a l'é nen un problema sientifich (contut ch'a permèta d'andé a parlé a la tele).

A l'é parèj che Sergio Salvi, da diletant anteligen com ch'a l'é, an sò ultim liber, "La lingua padana e i suoi dialetti" a s'angagia a vorèj "dimostré" che piemontèis, lombard, emilian, e via parèj a son tuti dialet ëd na lenga sola. La còsa bon-a ëd cost liber a l'é che tant gnun a lo lesrà. Andiretament, na rësponsta lenghistica ai padan e al padanèis a l'ha già dala, e pì 'd na vira, Perrini ansima a "Gioventura Piemontèisa" (ad esempi, an sèl n. 8 dèl 1998), an armarcand che 'l piemontèis a l'ha 'd particolarità lenghistiche e colturaj ch'as treuvo nen ant ij dialet lombard o ant j'altri dla Padania (e dl'Italia), e i consi jo a tuti 'd lese costi articoj.

Mi i veuj mach arpete che, an general, mach na cita part dij lenghista a s'antressa ancheuj a le question d'etimologia e 'dcò 'd classificassion, perchè a l'han capì ch'a son fàuss problema: minca classificassion a l'ha element artificisaj e artificios. A l'é për lòn che l'università as na frega dël padanèis ëd Salvi: perchè savèj s'a l'é mej parlé 'd lenghe e dialet "gal-italich" ò "gal-padan", ò mach "padan", a l'é mach na question ëd nòm. Foma n'autër esempi: l'olandèis a l'é na lenga ò un dialet? S'i disoma ch'a l'é na lenga a l'é mach perchè "a l'é fasse lenga", con na coltura e na sossietà che da vaire secoj a son e a veulo esse quèicòs ëd diferent da la coltura e da la sossietà alman-a. Al

midem temp, an Almagna a-i son tanti dialet che lenghisticament a son motobin pì davzin a l'olandèis che a l'alman, ma tuti, për sempietà e tradission, a parlo ëd "dialeto alman". E ancor: l'alman parlà an èSvissera a l'é lenghisticament fòrt malfé da capi për n'alman ëd Colònia, che për contra, s'a parla sò dialet, a vèd subit d'avèj tant an comun con l'olandèis; l'alman dla Svissera a l'é 'dcò chiel espression ëd na sossietà diferenta da cola alman-a, ma jè svizzer a l'han nen "decidù" ëd desse na lenga autonoma, e a seguito a parlé sò dialet e a dovré l'alman uffissial. E antlora? Antlora a l'ha rason nòst amis Telmon ëd l'Università 'd Turin: ël piemontèis a l'é n'astrassion. Mach ch'a l'é desmentiasse 'd di che minca lenga a l'é, fin-a a na sèta mira, n'astrassion. A l'é n'astrassion l'olandèis paragonà a l'alman, ch'a l'é 'dcò chiel n'astrassion, con ij sò dialet ch'a peulo esse pì diferent an fra 'd lor che con l'olandèis. E a l'é n'astrassion l'italian. E 'l padanèis?

Fin-a a s'i la stòria e la sossietà. E la lenghistica? Le classificassion "sientifiche" ëd la lenghistica as baso ansima a chèich carater ëd minca lenga ch'a son considerà pì "fòrt" perchè pì ràir e carateristich. Costi carater a ven-o ciama, nen pròpi a rason, "isoglossa". Për esempi, na carateristica bin fòrta dël piemontèis anvers a tuti j'altri dialet e lenghe padan-e a l'é la final "o" dla tersa pèrson-a plural dël present indicativ dij verb regolar (coma an "a parlo"); an general, le lenghe ch'a ven-o dal latin a l'han conservà na nasal (coma an italian "parlano" — ma 'dcò an "padanèis"), o a l'han perdù minca final (coma 'l fransèis modern "ils parlent", ch'as dis "il parl"). As capiss che se doman i trovoma 'n dialet fòra dal Piemont o li davzin ch'a l'ha la midema forma dël piemontèis i diroma

nen ch'a l'é 'n dialet dël piemontèis, perchè la classificassion a peul nen basesse mach ansima a na carateristica sola. Ant l'istessa manera, s'i sermo ma d'altre carater, ël piemontèis a sarà pì davzin al lombard, o al genovèis, o al fransèis. E tuti, as capiss, a l'avran d'element comun, che l'italian a l'ha nen. Për esempi, tuti ij dialet padan a deuvro "mi" al pòst ëd forme derivà dal latin "ego" (coma "io" an italian o "je" an fransèis). An cost sens-sì, ël padan a l'é, coma a dis Salvi, "la lenga dël mi" (coma a-i é la "lengua d'òch"). Ma ant l'istess sens as peul parlé dl'unità lenghistica (e 'dcò coltura) ëd la "Romània" (ij pais ch'a parlo 'd lenghe ch'a ven-o dal latin), e fin-a dl'unità lenghistica (e coltura) dl'Europa (an restand malfé, as capiss, parlé dl'unità d'Italia, an minca sens). A dipend mach da j'ocaj che un a deuvra, ociaj ch'a slongo o ociaj ch'a scurso.

Coma ch'i l'avia faje noté a Salvi, na lenga padan-a a peul magari esiste për la lenghistica stòrica, ma a esist nen ant la realtà (e ant la lenghistica ch'a descriv le lenghe vive, e ch'a l'é peul la lenghistica ch'a fan ij lenghista), perchè, an tuta sempietà, për ij lombard a l'é malfé capi ij piemontèis, e, dzortut, gnun, an parlend soa varietà lombarda, piemontèisa o emilian-a, a l'ha mai pensà 'd parlé na variant dël "padanèis". Èl padanèis a esist nen ant la cossensa 'd gnun, bòn.

Èl piemontèis a l'ha, ancheuj, na literatura — na literatura ëd tuti ij di, coma 'l giornal ch'i seve an camin a lese — che le lenghe padan-e a l'han nen. A l'ha, ant na paròla, na dignità; na dignità ancor cita, as capiss. Miraco a l'è avran, un di, ëdcò lombard e venet. I lo speroma e i soma pront a giusteje. Ma an restand piemontèis, nen "padan ossidentaj".

Mauro Tosco

## ÈL TENOR AN-NAMORÀ DL'ART ÈD BENIAMINO GIGLI



Beniamino Gigli

Ant ël simiteri 'd Recanati, ant na tomba an èstil egis-sian a forma 'd piramida, a 'rposà Beniamin Gigli: a l'é ambelessì ch'a nasso le fior dl'arconossensa e dl'arcòrd. I arpetoma col "ambelessì" perchè 'l "cantor dël pòpol", ël "Cign ëd Recanati" a l'é desmentia da tuti o squasi.

Soa vos "èd paradìs" a sè scota pì nen për television e bin da ràir a la radio: a manca la volontà d'educé ij giovo a la musica, cola genita. As parla tant d'

"arcesta", visadì ëd lòn che 'ncheuj a l'ha la preferensa, coma ij rumor ch'a 'nciorgnisso e ch'a l'han pòch da spartì con la vera musica, ma a l'é l' "oferta" ch'a conta.

A l'é na "regola econòmica" ch'a marca le sernie 'd mèrcà, ch'a spòsta le preferense e ch'a peul elevé o crasé ij gust dla gent. Ma bele ant l'abandon dla desmentia a nass la fior dl'arcòrd, che na man atenta a sa cheuje e guerné. A l'é për sòn ch'i voroma conteve na stòria vera, d'amor e 'd divossion testimoniana da n'adet a la cura dël simiteri 'd Recanati che 'n di a l'avia vèddù intré 'n giovnot con un mass ëd fior e a l'avia vèddulo avzinesse a la tomba 'd Gigli e posé le fior.

Dòp ëd chèich minuta 'd silensì, a l'era aussasse ant l'aria na bela vos da tenor ch'a cantava "Non ti scordar di me", la romanza 'd De Curtis tante vire cantà da Gigli.

Èl pòst, la melodia e la vos a l'avia daje a col adet, ch'a l'avia assistù, n'emossion creusa ch'a l'avia cissalo a conté 's fàit. Col giovo a l'é ancheuj, an soa pien-a madurità, un dij tenor italian pì avosà, motobin apressià da Rina Gigli, fija 'd Beniamin, ch'a l'ha premialo con la midaja d'òr ant la prima edission dël premi "Beniamin Gigli 'd Recanati".

Cost premi prestigios a ven dàit minca ann a n'artista an cariera ch'a l'abia dimostrà 'd merit uman e artìstich particolar o ch'a l'abia dedicaje a la musica tuta soa vita.

Nòst tenor a l'ha anandià ant ël 1978: arlongh ëd soa cariera a l'ha soens traversà ij termo 'd sò pais për canté an tut ël mond. A festegia cost'ann ij vintessinch ani 'd mariagi archincà da na bela famija che, për chiel, a ven anans a tut.

A l'é n'òm grassios, dal soris anciarmant, divòt a Pare Pio ch'a manca mai ëd

nominé an soe interviste.

Sò pont ëd fòrsa a l'é esprimù con ël timber candi ëd na vos druva e 'd bon-a comunicassion ch'a riva, con belfé, a j'acut ij pì sclin.

Pròpi ant le nòte pì àute a l'ha dimostrà anteligenza e umiltà ant ël emijoré, con ël temp, la tendensa a "strenze j'acut", e nen mach, ma a l'ha 'dcò coregiù la "silabassion tròp duverta", visadì la tendensa a esageré l'articollassion dle silabe che, an èslargand le vocaj, a tend a dobié la colòna d'aria e a sgnaca ij son.

Ancheuj sò registr àut a l'é liber e sclin. Ant la stagion d'òpera 1999-2000 i lo spettoma al teatro Regio 'd Turin për la "Lucia di Lammermoor". A l'é n'òpera "giusta" për l'artista che, nen a cas, a l'é considerà un dij tenor pì adat a j'òpere 'd Donizetti. Èl ròl a ofirirà l'ocasion ëd pèrfessioné le "mese vos" e ij "pian", tant tormentà an Gigli da chiel pijà coma esempi.

La ciadeuvra 'd Donizetti a l'era stàita presentà la prima vira a Napoli ant lè stember dèl 1835 e a l'avia avù 'n sucess eclatant.

A l'é l'anel ch'a uniss Rossini e Verdi: a l'é la prima granda espression d'un romanticism rivà a soa prima fioridura. Soa vitalità a sta ant la costrussion sicura, ant un vigoros rendiment dè stil ch'a uniss con bon echilibri jè svarià moment ëd l'assion.

Da ràir la musica 'd Donizetti a l'ha argionzù d'efet tant carià coma 'nt ël tema dël ghignon e dla vendeta con tuti ij dèsvlup tragich ch'a compòrto.

La bin fra Lussia e Edgard, già contrastà an sò nasse dal maleur e dal ghignon, ij sombr frut dla guera, veja dai temp dij grand antich, fra famije, ël crudel egoism ëd Lord Ashton ch'a sacrifica la seur a 'n mariagi ghignonà për arsani ij capitaj ëd famija, la folia 'd Lussia, la ràbia e 'l dolor d'Edgard ch'a finiss ant la

mòrt ëd chila e ant ël suissidi 'd chiel, a ciamo, për esse bin antèpretà, d'artista con n'umanità particolar: a basta nen na bela vos, a-i va na partessipassion total e na sensibilità unica, cola sensibilità dont l'autor a l'ha satù ij sò pèrsonagi. Për tò arcòrd tormentà dl'art ëd Beniamin Gigli, noi it ringrassoma ëd tut cheur Pietro Ballo!

Rossana

Pietro Ballo

